

# TE KARERE

## MEI TE VAI KI TE VAI - TE AKAOKI'ANGA MAI I TE TURANGA MEITAKI O TO TATOU TAI ROTO RAROTONGA – TE KARERE, MATI 2018.

### TE AKARAKARA'ANGA

- Marama Mati ra 22 te Ra o te Vai o Teiane Ai
- Tereni'anga tei raveia ete vaine kite marama no runga ite tu'anga ote Vai ete Vai Repo

### EAA TE TUPU NEI?

#### Mati ra 22 Te Ra o te Vai o Teiane Ai 2018

Ko te Ra o te Vai o Teiane Ai, e rave'ia ana te reira ite ra 22 o Mati ite au mataiti katotoa tei akatupu'ia e te taokotai'anga o te au basileia o teiane ai koia oki ko te United Nations (UN) no te akama'ara'ara'anga ia tatou i te puapinga o te vai. Ko te tumu tapura o teia mataiti koia oki – ko te Tu Natura o te Vai – ko te akara oonu atu'anga e ka akapeea ite ta'anga'anga 'anga ite natura note akameitaki ua atu rai ite au manamanata o te vai no teia tuatau.

Ko te tu'anga e akarakara matatio nei ite au manamanata ote Vai i roto ite UN, te karanga nei ratou e kote au kino e tupu nei kite ao rangi, topiri mai ki te tau'anga reva na te reira e opara nei i te au kino e tupu nei kite vai takapini i teiane ai. Me akonokore tatou ite turanga o to tatou ao natura, ka ngata i reira kite katoatoa kia rauka te vai tei anoanoia no te ora'anga ete tupu'anga meitaki.

Ko ta te Tango Angaanga o te Kuki Airani, topiri mai te MTVKTV e [Te Mato Vai](http://www.tematovai.com) (www.tematovai.com), e pati nei kia tatou i Rarotonga nei kia akamako tatou ite ta 'anga'anga 'anga i te vai ma te akono meitaki i to tatou au ara vai na roto i teia au ravenga mama:

Aru i teia au kaveinga no te taporoporo'anga ite vai i roto ite au ngutuare:

- ✓ Ta mate i te vai ia koe e 'uru ara i toou nio = ka rauka te taporoporo mei te 15 ritera vai ite meniti
- ✓ Akara ite au ngai e ta'e uara te vai mei roto ite au paipa puta – okotai topata ite tekoni = ka taeria kite 18 ritera i te ra.
- ✓ Akaiti mai i toou tuatau e pai ara mei te tai ki te rua meniti = ka rauka i te taporoporo mei te 560 ritera vai i te marama.

Aru i teia au kaveinga no te paruru i te au ara vai:

- ✓ Auraka e riringi i te au vairakau kikino ki runga i te one - koia te au vairakau ta mate manumanu, te au vairakau ta mate tita, te au vairakau no te rapakau maki, te peni, te inu toroka
- ✓ Auraka e ta'u i te tita ki raro i te au ara vai
- ✓ Ta 'anga'anga i te au pu'a kakau e kare teia au vairakau kino (phosphate) i roto.
- ✓ Ta 'anga'anga i te au vairakau tama ngutuare e kare te au vairakau kino i roto.



## Te apii ete tereni'anga tei raveia ete Vaine kite marama no runga ite tu'anga o te Vai

Tetai tu'anga puapinga i roto ite Tuanga Angaanga Mei te Vai Ki Te Vai (MTVKTV) koia oki kote akamatutu'anga ite turanga marama ete kite ote aronga 'anga'anga kia rauka ia ratou ite rave meitaki i te au 'anga'anga tei anoano'ia no teia tu'anga 'anga'anga note tuatau ki mua.

I te marama i topa, kua rave atu tetai vaine kite marama no runga ite tu'anga ote vai e pera te vai repo koia a Astrid Modrow (i roto i te tutu i raro nei e mou ra ite apinga vaito) i te oora'anga atu i tona kite ete marama kite aronga 'anga'anga mei roto mai ite au tu'anga angaanga ote Tango Angaanga ote Kuki Airani, Tipatimani ote Marine Resources e te pupu angaanga o te GHD. Ko Astrid, koia te manitia e akatere nei ite au tu'anga 'anga'anga ate DCM o Nu Tireni.



*Ko te vaine kite marama teia no te tua o te vai ete vai repo ko Astrid Modrow (tena i te tua kaui e mou nei i te apinga vaito vai) e te au aronga 'anga'anga.*

Kua rave atu a Astrid e tai ra tereni'anga no runga i te ta'anga'anga 'anga, koikoi'anga mai ite au mea e tupu nei i roto ite vai e pera te akono'anga i teia matini no te akarakara'anga ete vaito'anga ite turanga ote vai tei tuku'ia atu ki roto ite tai roto i Muri. Kua akakite aia e kote au mea me kore marama ka koikoi'ia mai na roto ite ta'anga'anga 'anga i teia matini ka riro te reira ite oronga atu i tetai tutu puapinga te ka rauka ite aronga kite marama ite topiri atu ki ta ratou e rave nei no runga ite ao natura o Muri, ko tetai tu'anga 'anga'anga teia ate MTVKTV.

Ka rauka i te ta'anga'anga i teia matini ki roto i te tai roto e pera te au ara vai i Muri. Ka rauka i teia matini i te koikoi mai eaa te tupu nei e pera te turanga o te au mea kino i roto ite vai, te au tau'anga o te turanga o te vai i muri ake i tetai ua'anga e pera tetai au mea puapinga. Ka riro teia au marama tei rauka mai ite topiri atu kite katoa'anga ote tu'anga 'anga'anga e raveia nei note akarakara matatio'anga e eaa tikai ta te au 'anga'anga tanutanu e pera katoa te au ngai vairanga'anga repo e tetai au 'anga'anga takake e akatupu nei kite turanga ote vai i roto ite tai roto o Muri.

Te tapapa nei te PMU ite oora atu ite au kite mua te ka rauka mai mei roto mai i teia au akarakara matatio'anga ite ao natura e pera te porokaramu vaito'anga a teia tuatau ki mua i teia mataiti.